

# 1 Tesalonicenses

Pablo ē tī ixtatā'scuja  
tatzo'kli a'ktin carta

**1** Ictzo'knumā'nauj quina'n,  
Pablo ē Silvano ē Timoteo.  
Iccātzo'knuni'mā'n hui'xina'n  
xalanī'n nac Tesalónica tī  
a'ka'i'yā'tit ē tapa'ksīni'yā'tit  
Dios quinTāta'ca'n ē nā  
Māpa'ksīni' Jesucristo. Dios  
cacāsīcua'lanātlahuan hui'xina'n ē  
tzej calatapā'tit.

Tasu'yulh chī ta'a'ka'i'lh  
xalanī'n nac Tesalónica

<sup>2</sup>Pō'ktu quilhtamacuj  
icmaxquī'yāuj tapāxcatca'tzīn  
Dios mimpālacataca'n ē  
icorarlīyāuj mimpālacataca'n.  
<sup>3</sup>Iccālīlacapāstacān pō'ktu  
quilhtamacuj na ixlacatīn  
Dios quinTāta'ca'n tū  
tlahua'tit hui'xina'n. Ū'tza'  
lītasu'yu chī a'ka'i'yā'tit.  
Iccālīlacapāstacān chī scujtit.  
Ū'tza' lītasu'yu chī pāxquī'yā'tit  
Dios. Iccālīlacapāstacān  
hui'xina'n chī jā makxtekā'tit  
a'ka'i'ni'yā'tit quiMāpa'ksīni'ca'n  
Jesucristo. <sup>4</sup>Dios cāpāxquī'yān  
hui'xina'n, tā'timīn. Quina'n  
icca'tzīyāuj Dios cālacsacnī'ta'n

hui'xina'n. <sup>5</sup>Xatze tachihuīn tū  
iccāquīmāsu'yuni'n hui'xina'n,  
ū'tza' jā xmān quintachihuīnca'n.  
Xa'iclimāsu'yuyāuj ixlīmāpa'ksīn  
Espíritu Santo. Tzej  
xa'icca'tzīyāuj ixlīcāna' xatze  
tachihuīn tū xa'icmāsu'yuyāuj.  
Hui'xina'n ca'tzīyā'tit chī  
lacatejtin xa'iclatlā'huanāuj  
a'cxni' xa'iccatā'huī'lachā'n.  
Xa'iclatlā'huanāuj chuntza'  
mimpālacataca'n.

<sup>6</sup>Hui'xina'n quilāmaksca'tui ē  
chuntza' maksca'txtutit Māpa'ksīni'.  
Masqui līpātīni'ntit a'cxni' a'ka'i'tit  
xatze tachihuīn, ixka'lhī'yā'tit  
tapāxuhuān ixpālacata Espíritu  
Santo cāmaxquī'n tapāxuhuān.  
<sup>7</sup>Taca'tzīlh chī hui'xina'n  
līlatā'kchokoyā'tit, nā chuntza'  
talīlatā'kchoko ixlīpō'ktuca'n  
tī ta'a'ka'i'nī't nac Macedonia  
ē nac Acaya. <sup>8</sup>Chuntza'  
līta'a'kahuani'nī't ixtachihuīn  
Māpa'ksīni' mimpālacataca'n. Jā  
xmān nac Macedonia ē nac Acaya,  
calhāxcuhuālh ca'tzīcan chī  
hui'xina'n a'ka'i'ni'yā'tit Dios. Ū'tza'  
jā ixlacasquī'nca iclīhuanāuj nūn  
a'ktin tachihuīn. <sup>9</sup>Ixlīpō'ktuca'n  
quīncātahuanīyān chī hui'xina'n  
a'ka'i'tit quintachihuīnca'n

a'cxni' iccāquilaklan. Huancan chī hui'xina'n litalakasp'i'tni'tit ídolos ē stālani'tit Dios, ē chuhua'j tā'scujā'tittza' Dios tī xalakahuan ē ixlicāna'. <sup>10</sup>Huancan chī hui'xina'n ka'lhīpā'na'ntittza' i'Ska'ta' Dios tī naminācha' nac a'kapūn. Huā'mā' Dios mālacastālancuanīlh. Huā'mā' ū'tza' Jesús tī quincāmakapūtaxtūyān, ē chuntza', a'cxni' Dios naputzāna'nikō', jā caquinticāmakapātīnīn quincuentaca'n.

### Chī Pablo scujli nac Tesalónica

**2** Tā'timīn, hui'xina'n ca'tziyā'tit jā chu tlakaj iccāquilaklan. <sup>2</sup>Hui'xina'n ca'tziyā'tit chī quincātamakapātīnīn ē quincātalakapalan nac Filipos a'cxni' jāna'j xa'icchā'nāuj nac Tesalónica. Masqui quincā'a'kspulan huā'mā', Dios quincāmakātāyan ē chuntza' iccāhuanin xatze tachihuīn tū Dios māca'tzīnīni'lh ē jā iclacapuhuanui, masqui quincātamāmakchuyīcu'tunni'. <sup>3</sup>Quina'n iccāmaxqui'n talacapāstacni'. Tū iccāhuanin hui'xina'n ū'tza' ixlicāna'. Jā tū iclacapāstacui'. Xa'iccāhuanicu'tunān ixtachihuīn Dios, ē xmān ū'tza' iccāquilīlaklan. Jā iccāqui'a'kskāhui'n. <sup>4</sup>Dios quincālaktzi'n xalactze ē quincāmacamaxqui'n na'icmāsu'yuyāuj xatze tachihuīn. Ū'tza' iclimāsu'yuyāuj chuntza' chī Dios lacasqui'n. Quina'n ā'chulā' ictlahuacu'tunāuj ixtalacasqui'nīn Dios ē jā ixtalacapāstacni'ca'n tachi'xcuhui't. Dios ū'tza' laktzi'n quilistacna'ca'n. <sup>5</sup>Hui'xina'n

ca'tziyā'tit quina'n jā maktin iccāquilīmāka'tli'n. Nūn tū iccāqui'a'kskāhui'makticu'tunni' mintumīnca'n. Huā'mā' Dios ca'tzi. <sup>6</sup>Jā xa'iclasasqui'nāuj caquincātalakachi'xcuhui'n tachi'xcuhui't, nūn hui'xina'n, nūn ā'makapitzīn, masqui quina'n ixapóstoles Cristo ē ū'tza' icliminī'ni'ni'tauj caquilīlakachi'xcuhui'uj. <sup>7</sup>Lilacatzucu xa'iccātā'chihuīna'nān hua'chi chā'tin puscāt tī cāmaktaka'lha ixlacstin. <sup>8</sup>Xa'iccāpāxqui'yān hui'xina'n. Ū'tza' xa'iccālimaxqui'cu'tunān jā xmān xatze tachihuīn; xa'iccāmaxqui'cu'tunān nā quilatamatca'n, chī xa'iccāpāxqui'yān. <sup>9</sup>Tā'timīn, hui'xina'n lacapāstacā'tit chī xa'icscujāuj ē chī xa'icpātīyāuj chī na'iclihuā'yanāuj. Quina'n jā xa'iccāmāmakasputūcu'tunān. Ū'tza' xa'iclisujāuj cā'cuhuīni' ē tzi'sa a'cxni' xa'iccāmāsu'yuni'yān hui'xina'n ixtachihuīn Dios. <sup>10</sup>Hui'xina'n laktzi'ntit, ē Dios nā laktzi'lh chī xa'iccātā'huīlan hui'xina'n tī a'ka'i'yā'tit. Quina'n tzeya chi'xcuhui'n xa'icuanī'tauj. Lilacatejtin xa'iclatā'kchokoyāuj. Nūn tū xa'ictlahuayāuj tū jā limacuan. Chuntza' jā tī chā'tin tzē naquincālimālacsu'yuyān. <sup>11</sup>Nā hui'xina'n ca'tziyā'tit chī chā'tin xatāta' cāmaxqui' talacapāstacni' ixcamana', chuntza' quina'n xa'iccāmaxqui'yān talacapāstacni' milipō'ktuca'n ē xa'iccāmākō'xamāka'tli'yān. <sup>12</sup>Xa'iccāhuaniyān ixlasasqui'nca lilacatejtin nalatā'kchokoyā'tit

chī Dios lacasqui'n. Dios ū'tza' tī cāta'sani'nī'ta'n jā xla' māpa'ksīni'n ē jā cā'tzēhuani't.

<sup>13</sup>Nā pō'ktu quilhtamacuj icmaxquī'yāuj tapāxcatca'tzīn Dios chī hui'xina'n a'ka'i'tit ixtachihuīn Dios a'cxni' xa'iccāhuaniyān. Hui'xina'n ca'tzītīt ē a'ka'i'tit tū iccāmāsu'yuni'n, ū'tza' ixtachihuīn Dios ē jā ixtachihuīnca'n tachi'xcuhui't. Ixlicāna' ixtachihuīn Dios. Ū'tza' tū scuja na milīstacna'ca'n hui'xina'n tī a'ka'i'yā'tit. <sup>14</sup>Hui'xina'n, tā'timīn, cā'a'nani'n chu lacxtim chī cā'a'nani'lh xalanī'n nac Judea tī tatapa'ksīni' Dios ē ta'a'ka'i'ni' Jesucristo. Mīntā'limacchicca'n cātaputzastālani'n hui'xina'n. Israelitas taputzastālani'lh ixtā'israelitasca'n xalanī'n nac Judea tī ta'a'ka'i'. <sup>15</sup>Israelitas tamakni'lh ixa'kchihuīna'ni'n Dios. Tamakni'lh Māpa'ksīni' Jesús. Ē quina'n quincātaputzastālani'n. Dios jā lakatī tū tatlahua xlaca'n. Xlaca'n tatā'lātlahua ixlipō'ktuca'n tachi'xcuhui't. <sup>16</sup>Xlaca'n jā quincātamakxtēkān na'iccātā'chihuīna'nāuj tī jā israelitas. Quina'n iccātā'chihuīna'ncu'tunāuj ixpālacata nata'a'kapūtaxtu. Chuntza' israelitas ā'chulā' taka'lhī ixcentaca'n. Ū'tza' nacālīmakapātīnīn Dios.

**Pablo ixcālaka'mpalacu'tun xalanī'n nac Tesalónica**

<sup>17</sup>A'cxni' iccāmakxtēkni' ē a'klhūhua' quilhtamacuj jā xa'iccālaktzī'nān, pō'ktu quilhtamacuj xa'iccālapāstacān

hui'xina'n ē xa'iccālaktzī'ncu'tunān.

<sup>18</sup>Quina'n xa'iccālaka'ncu'tunāchā'n hui'xina'n. Quit, Pablo, xa'iccālaka'ncu'tunāchā'n maklhūhua'. Skāhui'ni' jā quincāmakxtēkni' na'ica'nāchāuj. <sup>19</sup>A'cxni' Māpa'ksīni' Jesucristo namin ē natahui'layāuj na ixlacatīn, na'iccālīpāxuhuayān ixpālacata a'ka'i'yā'tit. Mimpālacataca'n naca'tzīcan chī xa'ictā'scujāuj Dios. <sup>20</sup>Chuntza' hui'xina'n quilāmaxquī'yāuj tapāxuhuān ē ka'tla' iclīmakca'tziyāuj mimpālacataca'n.

**3** Jā xa'icca'tziyāuj chī ixlīlatlā'hua'nā'tit, ē jātza' xa'ictāyani'yāuj. Ictipuhuanui xa'iclatachokouj quilīmānca'n nac Atenas, <sup>2</sup>ē xa'iccālakmacā'ncha'n Timoteo, quīntā'tinca'n. Xla' i'scujni' Dios ē māsu'yu xatze tachihuīn tū ixla' Cristo. Iccālakmacā'ncha'n nacāmāxquī'yān talacapāstacni' ē nacāmaktāyayān ixpālacata ā'chulā' na'a'ka'i'yā'tit.

<sup>3</sup>Huā'mā' ictlahuāuj ixpālacata jā nataxtutāya'yā'tit ixpālacata tū lipātīni'mpā'na'ntit. Hui'xina'n ca'tziyā'tittza' ixlacasqui'nca napātīni'nāuj huā'tzā'. <sup>4</sup>A'cxni' xa'iccātā'huī'lachā'n iccāhuani chī nalīpātīni'nāuj. Chuntza' a'kspulalh. Ū'tza' huā'mā' ca'tziyā'tit. <sup>5</sup>Ū'tza' iclīmacā'ncha' Timoteo. Jā xa'icca'tzī chī ixlīlatlā'hua'nā'tit, ē jātza' xa'ictāyani'. Xa'icca'tzīcu'tun palh ixa'ka'i'yā'titcus. Quit xa'icca'tzīcu'tun palh skāhui'ni' xmān ixcālīlaktzī'ni'ta'n. Chuntza' xmān xa'icscujtamaka'uj.

<sup>6</sup>Chuhua'j Timoteo cālaka'ni'ta'ncha'n ē chimpālhtza'.

Quincāhuaniyān chī tzej  
 a'ka'i'yā'tit ē chī lāpāxqui'yā'tit.  
 Nā quincāhuaniyān chī  
 quilālacapāstacmā'nanchāuj pō'ktu  
 quilhtamacuj ē quilāpāxqui'yāuj.  
 Xla' quincāhuanin hui'xina'n  
 quilālaktzi'ncu'tunāuj chuntza'  
 chī iccālaktzi'ncu'tunān nā  
 quina'n. <sup>7</sup>ICca'tziuj hui'xina'n  
 nā tzej a'ka'i'yā'tit. Ū'tza'  
 xa'iclipāxuhuayāuj, masqui  
 xa'icpātini'mā'nauj ē masqui  
 ixquincā'a'kspulamā'n tū jā  
 tze. <sup>8</sup>Chuhua'lj iclipāxuhuayāuj  
 ixpālacata icca'tziujtza'  
 hui'xina'n nā tzej a'ka'i'ni'yā'tit  
 quiMāpa'ksini'ca'n. <sup>9</sup>Chuhua'lj tzej  
 na'icmaxqui'yāuj tapāxcatca'tzin  
 Dios mimpālacataca'n.  
 Icmāxqui'yāuj lhūhua'  
 tapāxcatca'tzin Dios ixpālacata  
 iclipāxuhuayāuj na ixlcatin Dios  
 mimpālacataca'n. <sup>10</sup>Cā'cuhuini'  
 ē tzi'sa icsqui'ni'yāuj Dios  
 ca'iccālaka'ncha'n hui'xina'n  
 ixpālacata iccāmāsu'yuni'cu'tunān  
 ā'macsti'nal'j tū cāspu'tni'yāncus  
 hui'xina'n chī a'ka'i'yā'tit.  
<sup>11</sup>Dios, quinTāta'ca'n, ē  
 quiMāpa'ksini'ca'n Jesucristo  
 caquincātamakxteknin'  
 na'iccālaka'nāchā'n hui'xina'n.  
<sup>12</sup>Cacāmaktāyan Māpa'ksini'  
 ā'chulā' nalāpāxqui'yā'tit, ē ā'chulā'  
 nacāpāxqui'yā'tit ixlipō'ktuca'n  
 tachi'xcuhui't, chuntza' chī  
 quina'n iccāpāxqui'yān hui'xina'n.  
<sup>13</sup>Dios cacāmāhuixcānīn ē  
 cacāmāpānūni'kō'n ixlipō'ktu tū jā  
 tze na milistacna'ca'n ē chuntza' jā  
 tī chā'tin tzej caticālīmālacsu'yun  
 a'cxni' natāya'yā'tit na ixlcatin  
 quinTāta'ca'n Dios a'cxni'

namimpala quiMāpa'ksini'ca'n  
 Jesús ē ixlipō'ktuca'n tī ixla'.

**A'ktin latamat tū Dios lacasqui'n**  
**4** Ā'xmān iccāhuanicu'tunān  
 hui'xina'n, tā'timīn.  
 Quina'n iccāmāsu'yuni'n chī  
 nalīlatā'kchokoyā'tit chuntza'  
 chī Dios lacasqui'n. Chuntza'  
 tlahua'pā'na'ntit. Chuhua'lj quina'n  
 iccāsqui'ni'yān hui'xina'n ē  
 iccālīmāxqui'yān talacapāstacni'  
 ixlīmāpa'ksin Jesús: ā'chulā'  
 chuntza' calatā'kchokotit.  
<sup>2</sup>Hui'xina'n lacapāstacā'tit tū  
 iccālīmāsu'yuni'n ixlīmāpa'ksin  
 Māpa'ksini' Jesús. <sup>3</sup>Dios lacasqui'n  
 līlācatejtin nalatahui'la'yā'tit. Jā  
 tika'lhī'yā'tit mintā'lāpāxqui'nca'n.  
<sup>4</sup>Caca'tzītī milipō'ktuca'n chī  
 naputzayā'tit mimpuscātca'n  
 chuntza' chī minī'ni' na ixlcatin  
 Dios ē nā na ixlcatinca'n  
 tachi'xcuhui't. <sup>5</sup>Jā caputzatit  
 mimpuscātca'n chī jā tze  
 talacapāstacni' hua'chi tatlahua  
 chi'xcuhui'n tī jā talakapasa  
 Dios. <sup>6</sup>Jā tika'lhī'yā'tit  
 mintā'lāpāxqui'nca'n. Jā  
 tilā'a'kškāhui'yā'tit chuntza',  
 ixpālacata chuntza' tū tze  
 tlahuani'yā'tit ā'chā'tin  
 chi'xcu'. QuiMāpa'ksini'ca'n  
 nacāmākapātīnīn tī chuntza'  
 tatlahua. Ū'tza' huā'mā'  
 iccāhuaninī'ta'n hui'xina'n  
 xapūla. <sup>7</sup>Dios quincālacsacni'ta'n  
 ē xla' jā lacasqui'n natlahuayāuj  
 tū jā tze. Quincālacsacni'ta'n  
 natlahuayāuj tū xatze na ixlcatin  
 Dios. <sup>8</sup>Tī jā natamākentaxtū  
 huā'mā' tamāsu'yun, xla'ca'n jā  
 talakmaka'n chi'xcuhui'n; xla'ca'n

talakmaka'n Dios. Dios ū'tza' tī quincāmaxqui'yān Espīritu Santo.

<sup>9</sup>Hui'xina'n lāpāxqui'yā'tit litā'timīn, ē chuntza' jā ixlacasqui'nca na'iccāhuaniyān jā tū ixpālacata huā'mā'. Dios cāmāsu'yuni'nī'ta'ntza' chī nalāpāxqui'yā'tit hui'xina'n. <sup>10</sup>Chuntza' jā xmān lāpāxqui'yā'tit; hui'xina'n nā cāpāxqui'yā'tit ixlīpō'ktuca'n tā'timīn xalanī'n na ixlīpō'ktu estado Macedonia. Iccāsqi'ni'yān ā'chulā' cacāpāxqui'tit. <sup>11</sup>Nalihui'lī'yā'tit ca'cs natahui'la'yā'tit. Jā calīmaktanū'tit tū jā mimpālacataca'n. Calīscujtit mimacanca'n. Ū'tza' huā'mā' iccāhuaninī'ta'n pūla. <sup>12</sup>Chuntza' nacātalakachi'xcuhui'yān xlaca'n tī jā ta'a'ka'i' ixtachihuīn Dios. Nā chuntza' jā tū caticāspuṭni'n.

**A'cxni' namimpala Māpa'ksīni'**

<sup>13</sup>Iclacasqui'nāuj caca'tzītīt, tā'timīn, tū ixlicāna' ixpālacata tī tanīnī'ttza'. Chuntza' jā catilīpuhantit chī talīpuhuan xlaca'n tī jā taka'lhīmā'nalī natalakchā'n Cristo. <sup>14</sup>Quina'n a'ka'i'yāuj Jesús nīlh ē nā lacastālancuana'nli. Nā chuntza' a'ka'i'yāuj ixlīpō'ktuca'n tī ixta'a'ka'i'ni' Jesús a'cxni' tanīlh, nā xlaca'n nacāmālacastālancuanī Dios a'cxni' namimpala Jesús.

<sup>15</sup>Chuhua'j na'iccāhuaniyān tū huanlī quiMāpa'ksīni'ca'n. A'cxni' namimpala Māpa'ksīni' Jesús, quina'n tī xalakahuancus jā caticāmaxtekui xlaca'n tī tanīnī'ttza'. <sup>16</sup>Tzamā' quilhtamacuj Māpa'ksīni' nayujāchi nac

a'kapūn ē palha' nalīchihuīna'n līmāpa'ksīn. Xapuxcu' ángeles nata'sa. Namakata'sacan ixlīskolī' Dios. Ū'tza' nacālīmāca'tzīnīcan mimā'lhntza' Māpa'ksīni'. Xapūla natalacastālancuana'n xlaca'n tī ixta'a'ka'i'ni' Cristo a'cxni' tanīlh. <sup>17</sup>Palaj tunca xlaca'n ē nā quina'n tī xalakahuancus, quilīpō'ktuca'n naquincātamakayāhua'yān nac poklhnū'. Nalakchā'nāuj Māpa'ksīni' nac cā'ū'ni'n tālhmā'n. Chuntza' pō'ktu quilhtamacuj natā'tahui'layāchāuj quiMāpa'ksīni'ca'n. <sup>18</sup>Huā'mā' tachihuīn nalālīmāpastaqui'yā'tit. Chuntza' nalālīmākō'xamāka'tlī'yā'tit.

**5** Tā'timīn, jā ixlacasqui'nca na'iccāhuaniyān hui'xina'n jā'cxni' na'a'kspula huā'mā' ē jā'cxni' namin Māpa'ksīni'. <sup>2</sup>Hui'xina'n tzej ca'tzīyā'tit jā tī chā'tin ca'tzī jā'cxni' namin Māpa'ksīni'. Xamaktin namin hua'chi chī min chā'tin ka'lhāna' tzi'sa. <sup>3</sup>A'cxni' natahuan xalanī'n nac cā'quilhtamacuj: “Ca'cs hui'lāna'uj; jā tū catilālh”, xamaktin nala lakuat. Palaj nala lakuat hua'chi a'cxni' nachini' ixtaca'tzāt chā'tin puscāt a'cxni' namālacatuncuhui'nī chā'tin ska'ta'. Jā catitapūtaxtuni'lh lakuat. <sup>4</sup>Xlaca'n jā talakapasa Dios ē jā taca'tzī palh Jesucristo namimpala. Xamaktin natasu'yu hua'chi a'cxni' namin chā'tin ka'lhāna' tzi'sa. Hui'xina'n jā chuntza' chī xlaca'n. Hui'xina'n, tā'timīn, lakapasā'tittza' ixtachihuīn Dios ē ka'lhīpā'na'ntit Jesucristo hasta a'cxni' namin. <sup>5</sup>Hui'xina'n xalanī'n nac cā'cuhuīni' ē latlā'hua'nā'tit nac

cā'xkaka. Quina'n jātza' xalani'n nac cā'tzi'sni'. Jātza' latlā'huanāuj jā cā'pucsua'. <sup>6</sup>Hua'chi ixtalhtatani't xla'ca'n tī jā talacapasaxtachuīn Dios. Jā calauj chī xla'ca'n. Skalalh calauj ē cuenta catlahuāuj jā natlahuayāuj tū jā tze. <sup>7</sup>Cā'tzi'sni' lhtatacan ē cā'tzi'sni' ka'chīcan. Xalani'n nac cā'tzi'sni' hua'chi ixtalhtatani't ē hua'chi ixtaka'chīnī't, ixpālacata jā talacapāstaca tū ixla' Dios ē jā tatlahua cuenta chī lacatejtīn natalatā'kchoko. <sup>8</sup>Quina'n jā chuntza' chī xla'ca'n. Quina'n xalani'n nac cā'cuhi'ni'. Tropa ka'lhī ixlu'xu' xalicā'n tū nalitamaktāya ixlīstacna'. Quina'n ka'lhīyāuj tū nalitamaktāyayāuj nac quīlistacna'ca'n. A'ka'i'ni'yāuj Jesucristo ē pāxqui'nināuj chuntza' chī xla' quīncāmāsu'yuni'n. Ū'tza' lilitamaktāyayāuj na quīlistacna'ca'n. Ū'tza' jā makxteka natanū na quīlistacna'ca'n tū jā tze. Tropa ka'lhī ixtā'knu' xalicā'n tū nalitamaktāya ixa'kxāk. Quina'n ka'lhīyāuj tū nalitamaktāyayāuj quintalacapāstacni'ca'n. Quina'n a'ka'i'yāuj na'a'kapūtaxtuyāuj. Ū'tza' lilitamaktāyayāuj. Ū'tza' jā makxteka natanū tū jā tze talacapāstacni'. <sup>9</sup>Dios quīncālacsacni'ta'n ē jā quīncāmakapātīnīncu'tunān a'cxni' naputzāna'nīkō'. Quīncālacsacni' naquīncāmakapūtaxtuyān quīMāpa'ksīni'ca'n Jesucristo. <sup>10</sup>Jesucristo, xla' linilh ixpālacata quina'n natā'tahui'layāuj xla' jā hui'lacha', palh nīnī'taujtza' o lakahuanāujcus a'cxni' xla' namimpala. <sup>11</sup>Ū'tza' huā'mā' calālimaxqui'tit talacapāstacni' ē

calāmāhuīxcānī'tit chuntza' chī tlahuapā'na'ntit hui'xina'n chuhua'j.

**Pablo cāmaxqui'lh  
talacapāstacni' tā'timīn**

<sup>12</sup>Tā'timīn, iccālīsāhuanīyān cacālakachi'xcuhi'tit tī tascuja na milacpu'nanca'n, tī cātāmāsu'yuni'yān ē cātastacyāhuayān na ixlacatīn Dios. <sup>13</sup>Cacālakachi'xcuhi'tit ē cacāpāxqui'tit ixpālacata ixtascujūtca'n. Hui'xina'n calāpāxqui'tit.

<sup>14</sup>Iccāmaxqui'yān talacapāstacni', tā'timīn. Cacāquīlhnī'tit macsti'na'j tī xmān talatlā'huan ē jā tascujcū'tun. Cacāhuanilī'pintit tī tataxluajuani'nī't. Cacāmaktāya'tit tī jāna'j tzej ta'a'ka'i'. Cacātāyani'tit ixlīpō'ktuca'n.

<sup>15</sup>Calīhui'li'tit nalātlahuani'yā'tit tū tze. Nā chuntza' cacātlahuani'tit ixlīpō'ktuca'n tū tze. Jā titlahuani'yā'tit ā'chā'tin tū jā tze, masqui xla' cātlahuani'nī'ta'n tū jā tze.

<sup>16</sup>Pō'ktu quīlhtamacuj capāxuhua'tit. <sup>17</sup>Pō'ktu quīlhtamacuj ca'orarli'tit. <sup>18</sup>Camaxqui'tit tapāxcatca'tzīn Dios catūxcuahuālh tū nacā'a'kspulayān. Chuntza' Dios lacasqui'n natlahua'yā'tit hui'xina'n tī tapa'ksīni'yā'tit Cristo Jesús.

<sup>19</sup>Jā camāmīxīnī'tit ixtaxkaket Espīritu Santo. <sup>20</sup>Jā calakmaka'ntit tū tahanan ixa'kchihuīna'nī'n Dios. <sup>21</sup>Tzej nalacapāstacā'tit palh tze o jā tze tū tahanan ē camaktīnī'ntit tū tze. <sup>22</sup>Camaxtektit pō'ktu tū jā tze.

<sup>23</sup>Chu ū'tza' Dios cacātlahuan hui'xina'n lactze. Dios ū'tza' tī quīncāmakapāxuiyān. Icsqui'ni' Dios

cacāmaktāyan jā natlahua'yā'tit  
 tū jā tze. Cacāmaktāyan jā natanū  
 tū jā tze na mintalacapāstacni'ca'n  
 ē na milistacna'ca'n hasta  
 a'cxni' namin quiMāpa'ksīni'ca'n  
 Jesucristo. <sup>24</sup>Ixlipō'ktu huā'mā' Dios  
 nacātlahuani'yān ixpālacata ū'tza'  
 tī cālacsacni'ta'n ē ū'tza' pō'ktu  
 quilhtamacuj mākentaxtūkō'.

**Ā'xmān tasicua'lanālanī'**

<sup>25</sup>Tā'timīn, ca'orarli'tit  
 quimpālacataca'n.

<sup>26</sup>Cacāsaludarlitit ē  
 cacāsko'ka'tit ixlipō'ktuca'n  
 tā'timīn chuntza' chī mini'ni'  
 chī litā'timīn tī tatapa'ksīni'  
 Dios.

<sup>27</sup>Iccālīmacamaxquī'yān  
 ixlīmāpa'ksīn Māpa'ksīni'  
 cacālīkelhtahua'ka'ni'kō'tit  
 ixlipō'ktuca'n tā'timīn huā'mā'  
 carta tū ictzo'kmā'lh.

<sup>28</sup>Cacāsicua'lanātlahuan  
 quiMāpa'ksīni'ca'n Jesucristo.  
 Amén.